

# Misi, peserta baharu GISO

ARP garap ciri kepimpinan di samping kembara di bumi Islam yang memerlukan bantuan

**KEMBOJA** - Misi Kembara Merentasi Sempadan - Kemboja tahun ini membawakan dimensi baharu apabila disertai mahasiswa Fakulti Sains dan Teknologi Universiti Sains Islam Malaysia (Usim).

Misi yang diberi nama Pengembaraan Usim Global Islamic Student Outreach (Giso) 2014 ini, disertai 30 orang terdiri daripada 25 mahasiswa, seorang pensyarah, dua wakil penganjur dan tidak ketinggalan penyertaan istimewa Imam Muda Azhar dari program *Imam Muda* musim pertama.

Dianjurkan oleh Al-Itisam Relief Program (ARP), misi ini merupakan pertama kali buat kesemua mahasiswa ini.

Pengarah Eksekutifnya, Mohd Shah Sapie berkata, penganjuran ini akan memberi peluang kepada golongan muda untuk berbakti dalam aktiviti kemasyarakatan.

"Dalam program sebegini, secara tidak langsung dapat mendidik diri mereka untuk membantu saudara Islam di Kemboja.

"Kita berharap usaha ini akan dapat menjadi ikutan kepada remaja lain," katanya.

Misi selama enam hari bermula hari ini akan menjelajah ke beberapa perkampungan di Phnom Penh



dan Kampung Ampel bagi memberikan bantuan kepada penduduk setempat.

Dalam misi sebelum ini, sebanyak 760 keluarga di Kampung Ambel menerima bekalan air bersih apabila menerima sumbangan 36 buah telaga daripada Jaringan Industri, Masyarakat & Alumni (Ican), Universiti Teknologi Mara (UiTM).

Penduduk Kampung Ambel sememangnya sangat mengharapkan sumbangan telaga ini yang menjadi punca air bersih buat mereka.

Walaupun ada beberapa kawasan yang mempunyai kemudahan bekalan air paip tetapi kebanyakan penduduk di sini miskin, tidak mampu membayar kos pemasangan paip dan membayar bil air.

Kampung Ambel, sebuah kampung yang diduduki masyarakat Islam Kemboja jauh di pedalaman.

Masih banyak keperluan asas seperti sekolah diperlukan bagi membantu kanak-kanak di sini mendapat pendidikan yang sempurna.



Kanak-kanak menerima sumbangan pakaian pada misi terdahulu



Penduduk kampung beratur untuk menerima sumbangan pakaian pada misi sebelum ini

